

Il Seminari filantropin da Rehanau (1793–1798)

Ina publicaziun nova

DA GUIU SOBIELA-CAANITZ

Fundatur
Johann Baptist von Tscharner

■ **«R[ehanau] fa part da la fracz[iun] da La Punt/Rehanau (vischn[anca] da Tumein). Signuradi e chastè a la confluenza dals Rains anteriur e posteriur.** Il num R[ehanau] sa referescha a la claustra cun il medem num al Lai da Constanza ch'aveva acquistà dretgs feudals a R[ehanau] en il temp medievale tempri» (1).

Il chastè da Rehanau è vegnì impur tant per la cultura grischuna grazia al moviment filantropin: «Ils filantropins grischuns han lur origin en il seminari fundà 1761 da Martin von Planta [1727–1772] a Lantsch Sut sut l'influenza dal moviment pedagogic illuministic (...)».

Tar l'observaziun, la scolaziun e l'exercizi en l'autodeterminaziun duvan ils giuvenils (92 scolars il 1770) sa sviluppar a burgais conscients da lur atgna responsabladad (...). Alura ha Johann Baptista von Tscharner [1751–1835] empruvà da cultivar il spiert da quel seminari filantropin cun ina 'Nationalschule' (...) transferida il 1793 en il chastè a la Punt/Rehanau» (2).

L'istoricher Werner Ort ha gist publicità in essai davart lezza scola per giuvenils (3). I suonda ina curta recensiuin.

L'emprim rapporta l'autur davart il lieu Rehanau: «In document da 1399 menziuna ina 'punt da duana' sur il Rain anteriur. En in document da 1424 stat ina 'punt da Rehanau' (...). Cur ch'ins haja bajegià las punts, quai na san ins betg; dentant san ins ch'i eran impurtantas per ils lieus a dretga ed a sanestra dal Rain e da la Surselva cun Cuira e ch'i segiravan l'import da vin, graun u fritga meridiunala da l'Italia (...) vers il Grischun ed il traffic da transit tranter la Svizra e l'Imperi tudestg cun l'Italia (...). Anc il 1796 stueva in dazier (...) survegliar la taxa» (pp. 17 e 19).

Il 1792 è Johann Baptist von Tscharner (1751–1835) da Cuira «sa participà a l'acquist dal chastè da Rehanau nua ch'el ha reinstallà» (4) il Filantropin da Marschlins (Eigias). «L'avrigl 1793 ha'l fatg stampar in prospect d'otg paginas en tudestg, franzos e talian. La terza part numnava ils roms instruids: «Mintga scolar duai frequentar mintga di sis uras d'instrucziun scientifica e var duas da musica, dissegn euv. tenor la finamira e l'abiltad da mintgin. Ils geniturs ed il talent duain determinar tge ch'el duaja emprender» (pp. 65–66). La glista cuntegn deschedotg puncts; quatter dattan en egl:

– Ils roms «dogmatica refurmada ed evangelica» e «dogmatica e morala catolica romana» mussan ch'il seminari era avert a domaduas confessiuns dal Grischun.»

– «Linguas: Tudestg, latin, franzos, talian, englais; plinavant, sin giavisch spezial, grec, ebraic e noss rumantsch retic.» L'englais n'era anc betg linguatg mundial sco oz; ma l'interess da Tscharner po derivar da sia admiraziun illuministica per la revoluziun americana da 1774. Il rumantsch valeva sco rom d'instrucziun; la varietad dals idioms na pareva betg da disturbar il scolast.

– «Istorgia generala, atgna istorgia dal Grischun, da la Svizra, da l'Italia, Germania, Frantscha euv.» Cun «Germania» manegiava Tscharner probablamain l'imperi ad ost ed a nord dal Grischun, pia cun il Tirol. «Italia» era lezza giada mo ina 'expressiun geografica.»

Dus docents en temp da guerra europeica

La Frantscha perencunter era ed è in stadi. Ses svilup en il davos decenni dal 18avel tschientaner ha influenzà Rehanau. Ils 21 da schaner 1793 a Paris ha il boier da la republica executà l'anteriur retg Ludovic XVI (*1754). Ses parent («prince du sang») Louis-Philippe von Orléans (1773–1850) è fugì a Bremgar-

ten/AG; ils 24 d'october è el vegnì magister a Rehanau sut il pseudonim da «Monsieur Chabos». Ma la guerra tranter Habsburg e la Frantscha ha chaschunà la rebeliun dals Lumnezians cunter Cuira. Tscharner ha decidì da serrar la scola e dà a «Chabos» «ils 30 d'avrigl 1794 in attest stupent sco magister da matematica, istorgia e geografia» (p. 100). Lur ha lez bandunà il Grischun. Suentar la restauraziun da la monarchia franzosa 1814 è Louis-Philippe turnà en ses pajais nua ch'el è vegnì retg il 1830. Entant aveva Tscharner 1795 mess puspè ad ir il seminari da Rehanau. Il scienzià tudestg Heinrich Zschokke (1771–1848) è lura vegnì là docent d'istorgia e tudestg. «Cur ch'i na deva mezs d'instrucziun procurava el sez per tals (...). Il zercladur 1798 è cumparì [a Malans] 'Das neue und nützliche Schulbüchlein, zum Gebrauch und Unterricht für die wissbegierige Jugend im Bündnerland'. [Il pedagog] Neseemann ha scrit l'emprima part (...) e Zschokke la segunda e la terza (...). Cun la translaziun rumantscha han ins incaricà Matthias (Mattli) Conradi (1745–1832), preditgant ad Andeer. Ils 2 d'avust 1797 ha Zschokke rapportà (...) che la traducziun rumantscha saja 'unter der Presse'; cumparida è ella però pir 1826 [a Cuira tar A. T. Otto] (...). Zschokke aveva stuì fugir da Rehanau ils 9 d'avust

1798. L'october eran truppas austriacas entradas a Cuira. 1799 han ins denunzià plevon Conradi sco ami dals Franzos; lur è el vegnì (...) deportà a Puntina» (pp. 234–235 e 238). Il schaner 1798 a Turitg era cumparì «Die drey ewigen Bünde im hohen Rhätien. Historische Skizze von Heinrich Zschokke». Il matg han ins stuì serrar il seminari per adina. Il favrer 1799 ha general André Masséna (1758–1817) dentant «surpiglià il cumond da l'armada franz[osa] da la Helvezia (...). Il mars ha el conquistà il Grischun ch'el ha fatg incorporar en la Republica helvetica (...). El ha obtegnì ina victoria decisiva cunter ils Russ (...) ils 25 da sett[ember] (...) ch'ha terminà la preschientscha da las truppas coalliadas en Svizra» (5).

1. Linus Bühler en: *Stiftung Historisches Lexikon der Schweiz* (ed.), *Lexicon Istorico Retic, tom 2. Cuira (Desertina, ISBN 978-3-85637-391-7)* p. 240, chavazzin «Rehanau».
2. Martin Bundi en: *Stiftung Historisches Lexikon der Schweiz* (ed.), *Lexicon Istorico Retic, tom 1. Cuira (Desertina, ISBN 978-3-85637-390-0)* p. 352, chavazzin «Filantropins».
3. Werner Ott, *Die Schülerrepublik im Schloss Reichenau. Baden/AG (Hier und Jetzt, ISBN 978-3-03929-463-6)* 2018.
4. Martin Bundi en: *Stiftung Historisches Lexikon der Schweiz* (ed.), *Lexicon Istorico Retic, tom 2 (sco nota 1)*, p. 482, chavazzin «Tscharner, Johann Baptista von».
5. Sébastien Rial en: *Stiftung Historisches Lexikon der Schweiz* (ed.), *Lexicon Istorico Retic, tom 2 (sco nota 1)*, p. 25, chavazzin «Masséna».